

ويقولوا

ويقولوا سييبة تعبان ومترديش

ولو عدي قصاد البيت فلا تقفي له عند الباب

وسكي الشيش

ولا تخليه يشوف طيفك ولا يسمع صدي صوتك

واحسن له يروح مي جيش

كلام موزون ومترتب بميت حكمة

م هما شافوني لما عانيت ..ولما بكيت

ولما الجرح صار، ينزف ساعة م جنبه ساب البيت

ولما رجعت من تاني وكات افعاله وجعاني

ورحت شكيت

ف بيلوموا ...

يقولوا ضعيفة مش قادرة وحجتها .تقول حبيت

وايه فيها؟؟

م هو صحيح انا حبيت !!

لكن مش حب م العادي ولا قصة وكلام فاضي

دي عشرة عمر فيها كتير من الحواديت

مشينا طريق طويل جداا ورغم السن والخبرة

علي ايده انا اتربيت

انا هحكلكم القصة في موجز مختصر جدا

مع كام بيت

انا وهو،مكناش قصة م العادي

بمعني كنت نا عشقته بكل كياني وفؤادي

وهو عشقتي وبقوة ف عز النوم يتمم اسمي وينادي

وكنت حبيبته وعشيقته وكنت امه وكنت اخته

وكنت الزوجة واللمة وكنت الخالة والعمة

وكنت صحابه وقت الشدة اخده ف حضني وادادي

مهو كان لي كعيلة كاملة تكفيني وكان واحد من اولادي
ولكن كل شئ مكتوب .. قدر
قدر ونصيب ولما يصيب م تقدر، عنه لحظة تغيب
وتملا الحجر بالمقسوم
ومن امتي الفرح بيدوم؟
ولا الراحة ولا الهيبة ... ويدخل ميت شيطان بينكوا
يصيب القصة بالخيبة
تبات مهموم .. اكيد .. معلوم
م هي الفرقة تجيب اوجاع اكيد بالكوم
وانا
أنا موجوعة بزيادة و بتألم
وكالعادة وناس بتلوم
عرفتوا القصة يا سادة
أنا موجوعة بزيادة

وهو، كمان

انا عارفاه بيتألم اكيد تعبان

وجرحي اللي نزيفه مرار وقصتنا ورا الجدران

ومين فينا اللي باع او خان.. صبح دخان

حاولت كتير ابيع وانسي واحاول اشترى نفسي

واقول الحب عمره م كان

لقيت نفسي كمان بتروح ..

م هيا القصة ساكنة الروح

واهو راجع.. وتاني بالغرام ببيوح

وقال تعبان وقال مشتاق

وقال انت الهوي فيا وانتي الروح

انا زيك ببات مجروح

فدلوني

انا مش عاوزة غير صوتة..

يريحني وكلمة حنينة منه تفرحني

انا مش طالبة ييجي البيت

ولا عاوزاه يجيب فاكهة

ولا يساعدي في المصروف

انا مش طالبة غير قربه يرد الروح..

ولما ازهق لعنده اروح

ونحكي لبعضنا ونبوح

واحكي له ويشكي لي

مهو احنا بعيد عن الورقة اللي مكتوبة ..

روحين جمعها رب العرش داخل روح

انا يا سادة بعلمها

انا ف بعده بموت م الخوف

فلا تقولوا

ولا تلوموا .. وسيبوا الجرح للمجروح!!!

